


歷代劍俠全傳



上海廣益書局發行

歷代劍俠全傳卷六


溧陽許慕羲編輯

近代時期二

清代之劍俠下

獨力斃盜

魯曹州邑東有某村。去郭三十里。地至偏僻。邨人好植椿。夏時繁綠陰滿。蔚然成林。邨中居戶僅百許。鷄犬雜羣。和鳴聲相望。鄰里酬接融然。出至誠。日午則紡績。聲達戶外。家咸豐飽。無饑踣不能自存者。第不知文。邨中無學塾。子弟多習武。十餘齡即能馳馬。矢百步外無虛發。以曹邑多盜。故人人咸知挾技以自衛。邨中尤有奇習。每歲春三月。子弟必競出郊外獵山狐。獲夥者勝。有一日得三十頭者。親戚置酒相慶。比于得官。某歲春循例復爲是舉。時方春暮。新綠彌望。野花微露出。



籬落日光薰淑。若入首夏。飯午。子弟咸鮮衣健蹄至。老奴負囊尾之。囊次纍纍者。皆良矢。子弟貌咸魁碩。赳赳作英奮狀。其一獨皙好。臨風癯姿。若不能勝羅綺。時觀者盛集。婦稚喧闐。素巾玉袂。蓋爲邨中殊艷矣。至日旣昃。衆始言旋。獲狐夥者。卽癯少年。得百頭。三倍於衆。衆咸詫絕。鄰居趨其家。爭賀焉。癯少年徐姓。字冠南。家邨中僅五稔。蓋他邑遷至者。每歲較獵。未嘗與。故邨人無知其能者。至是名震。然平居匿處。不恒出。有造其室者。亦未嘗見。蹤至秘也。邨中有秦某。以拳勇聞。心尤險狠。有出其上者。必陷之絕地。以爲快。前歲有劉道士。嘗於旅邸宵殮三匪。邨人交譽之。秦心嫉焉。他日以計沉之于河。而劉道士以冤劾。其妬才忌能類如此。至是聞冠南名。益不自安。計必有以摧之。一夕。短裝佩刃。踏月竟出。微步至冠南家。躍登樓。隙窗睇視。則雙幃寂如。無人之居也。心賊亟下。急步返其居。途中聞有嘯聲。清厲似鶴唳。知有異。闔門逕睡。夜午。方入夢。忽聞異聲。寒飈颯然。帳帷微震。諦視。則植立枕畔者一冰刃。苔華微暈作光。曄曄逼人。賊極噤。不敢復語。自是秦

豪鋌漸斂。遇人微恭。無復努目作健兒狀矣。會曹州盜夥大集。短袴健兒出沒烟火間者。以千計。劫案如山。邑令柔懦。竟無以爲理。盜益恣。其中尤以金刀酋爲魁。能飛劍三十里外。取人首。應手卽得。次爲餅師阿五。亦梟俊也。金刀酋不審其何自出。以佩金刀。遂名阿五。初爲餅師。日夕擔鬻城市。未嘗有他異也。年餘忽棄業。隨道師入泰山。居山五年。出貌益黧。軀益癯。髮咸垂白。而技獨卓絕。十尋之牆。徐指卽洞。彈玉玉碎若灰。步履無聲。冬夏一夾衣。終歲不執業。自活如恒。衆于是始異之。至是竟入盜夥。深巖叢篁中。高拱作南面坐矣。曹城富室。聞風咸惴惴。有莊姓者。擁資千萬。聘延勇士百人。以自衛。客咸四方知名士。賴以無恐。於是富室競效之。冠南遂亦爲葉姓者所聘。葉家城中。屋近百椽。極亭閣之勝。宅後有園。平亭曲榭。四時之麗景在焉。冠南徜徉其家。乃至樂。家固有母。亦依葉而居。葉共延拳士二十人。主人咸厚禮之。其視冠南。尤出他客上。秦某聞之。則躍起曰。此機可乘也。遂造葉家。語主人曰。聞公新得徐君冠南。僕願得一見。主人引冠南出。秦長揖。

曰。吾公天下士。曹州之人。所共屬望。僕無似。願得與公一交手爲榮。寇南遜謝。秦固請。且曰。請不假武器。僕造請。公當先拳。寇南諾。秦遂堅立。寇南徐徐引一拳。秦微呼。顏色遽白。然竟不墜。寇南遽曰。可矣。舉曹州勇士。當吾拳無不殆者。足下能無恙。真吾敵也。遂握手相歡好。莊某聞之。亟賚巨金。造秦家。秦遂入莊氏居。厚禮之。亦出他客上。秦旣被殊寵。益恣言。寇南無能。酒酣告其儕輩曰。始我與寇南角。寇南拳吾。吾植立如故。吾還拳。則渠竟仆矣。從知盛名之下。無異才。紛紛者。寧足當我一睨耶。有舉以告寇南者。寇南一笑。不言辯也。如是者三月。而城中流言曰。播。謂金刀酋將挾其類三千。大掠城內外。而阿五亦與金刀酋合。故聲勢且益偉。富室聞之。則日夕讌其所延客。曰。僕家產悉付之諸公矣。唯諸公無負僕望。衆咸諾。一夕。莊姓方作盛宴。宴秦某。鹿脯。童羊之蹄。浙釀。而美饌尙無數。秦傲然踞首座。豪飲可數十杯。而莊姓勸酒益勤。曰。僕欲得諸公相助。非盛饌宴諸公。心且不安。諸公第飲。飲則力益壯。毋慮彼鼠子矣。夜三鼓。衆咸劇醉。秦尙牛飲。態益恣。方

舉杯。忽有風竄然。銀燭二十枝盡滅。全室頓黑。而盜匪無數。自花牆下。暗中但見白刃作光。主人亟遁。而勇士咸泥醉。一一受戮。秦大震。杯失手碎。亟拔腰際利刃。而金刀酋適至。一椎奔至。秦兩臂俱顫。刃琅然墜地。秦自顧必死矣。金刀酋方舉椎。忽背後一人執炬至。以矛貫金刀酋腦。金刀酋遽仆。秦視之。則徐冠南也。匪見渠魁喪。咸無戰志。遂奔散。而阿五方病起。亦遽歸。匪既去。主人匍匐出坑下。秦則如夢醒。見冠南在前。而衣襟濺酒無數。始憶前事。遂泥首謝冠南。冠南笑曰。聞公急難。故來相救。幸遇我。否則金刀酋不易殲也。今後公尙言盛名之下無異才耶。秦慚沮。泥首無數。自是冠南之名滿全魯。曹之盜咸側目曰。是能以一矛死金刀酋。豈可敵耶。道先時。有京口武舉文某者。善拳術。習硬工。力舉三四百斤。氣不喘。而面不頰。誠勇士也。某日。過維揚。行於郊外。時正炎夏。赤日如火。文汗流遍體。口渴難忍。急欲得杯飲。無奈荒郊僻野。既乏煙突。又絕細流。滴水難求。文覓之久。方得一破寺。入視。見蛛網滿佈。塵埃寸積。大殿中一老僧。跏趺坐蒲團上。文卽向之。

乞水。三詢不答。怒甚。奮拳擊僧胸。拳着如綿。而頓覺痛入肺腑。骨幾爲碎。然拳仍着僧胸。牢不可脫。欲推勿能。欲收亦勿能。文心知遇異人矣。急下跪求恕。有頃。僧始張目曰。血氣方剛。戒之在鬪。少年何鹵莽乃爾。今日幸遇老衲。不然廢矣。文覺拳自脫。不痛不癢。麻木乏力而已。僧曰。坐。吾語汝。少年亦知吾何如人乎。曰。不知。曰。吾峨眉十八郎也。同師者及吾共十八人。皆擅絕技。善易筋工。北道無我敵也。某日。十二十三二師兄歸。乞於師。謂有夫婦二人。保鏢銀數百萬。由北南下。二人欲刦之。而憚其勇。慮勿勝。故特來請命師兄弟共往。師勿許。然衆師兄聞數百萬。無不心動。遂共跪求下山。師嘆曰。孽哉。若少年不經事。不識世故耳。試思一夫婦而保數百萬。其技可知矣。所謂強中還有強人在。彼殆劍俠也。汝曹勿行爲是。衆反以爲激之。僉曰。我衆彼寡。無患也。師嘆息。顧予曰。十八郎留此乎。衆皆以目示意。余遂曰。余亦願往。師長嘯一聲。知不可阻。遂許之。惟囑余處處退步。余領之。隨衆下山。止於潼關外某山上。以俟之。約一二日。探得鏢已抵關。停關內某宿店。師

兄等遂決意卽夜刦之。防白日或不敵也。至初鼓。大師兄命余先入關探之。既至宿店。余躍登彼夫婦臥室屋頂上。揭片瓦下窺。見其夫已醉臥。而婦則憑窗於燈下製鞋。銀車皆列床後。余以孤身在此。且想及師言。遂不敢下。候久之。師兄等仍勿來。再窺婦仍未睡。惟製鞋時。時以針抹頭上油。或就抵窗上刺之。既而魚更四躍。婦忽仰首曰。十八郎且下。余大驚。然心知逃必不能。故決死揭瓦而下。婦啟窗指庭中曰。速移之返。否則余夫醒。汝亦殆矣。噫。少年乎。庭中非別。余十七師兄也。皆橫陳矣。余知不能敵。乃含悲忍痛。別婦。肩十七屍越關出。至山而驗之。豈知無絲毫之傷。而人則冰矣。余亦莫解。痛哭至天明。於日光下再驗之。始見十七師兄之眉心中。皆有一刺痕。方知婦以針刺窗時。卽余十七師兄畢命時也。余葬屍畢。參透紅塵。遂削髮爲僧。今年七十矣。吾工尙在。子之受者。卽是彼十七師兄。勝吾數倍。而勿能敵一少婦。子壯吾老。而勿能勝吾。子其猛省矣。文聆畢。汗流浹背。口亦不渴。卽別僧歸。他日再訪之。寺焚而僧杳矣。文歸。遂終身不談武。常以此事戒。

血氣少年焉。

盜竊姻緣

天台胡孝廉斌，天姿慧敏，嗜學多能。年十八，卽登鄉舉。父以武進士，侍衛藩邸，拳勇聞天下。胡盡傳其術，手挈鐵丸二，彈人百步外，百發百中，號萬人敵。性介爽，取與不苟。有古任俠風。家於城東，與林太僕宅鄰。太僕有女，曰慧仙，美而能文。及笄未字。會大雨旬日，胡牆傾圮，與太僕西園通。一夜，胡讀書燈下，女忽潛入。胡大驚起立，女曰：妾閱人甚多，品端才美，無踰君者。願訂永好，非敢效文君夜奔也。胡曰：以卿才貌，實所欽佩，然各有父母，不能自主，未可預訂也。女躊躇良久，以金釧要盟。胡拜而却之，曰：成否難以逆料，盟而背之，何以爲人。女益感其誠，洒淚而別。胡送之出，曰：婚媾前定，非可強求。今後勿犯多露，人言可畏也。且而以意告母，將媒灼之。母以父在都中，且太僕亦供職卿寺，將使子於公車北上時，就商於父。胡亦以爲然。時村中來一丐，手持二石獅，重皆百餘斤，每至市肆，以獅置櫃上，大聲索

錢市人畏而惡之。胡偶至雜貨肆中，見兩獅植立櫃上，店主予之錢，丐少之，不去。胡怒其狠，以手撲獅，墮地立碎，丐大駭，逸去。市人咸快之。後旬餘，又一僧至，狀貌猙獰，而服飾鮮麗，侍從四五人，皆山東大漢，於隙地布帷舞劍爲戲，入觀者，給錢二十，觀者甚衆。胡亦潛入，見僧手舞四劍，兩劍常在空中，但見白光一道，忽上忽下，劍鋒削處，寒氣侵人，觀者目眩耳聾，驚異不置。見胡至，相謂曰：胡孝廉亦能相敵否？僧聞言，把劍斜睨之。少頃，對衆曰：顛倒一身，殊太寂寞，諸君肯賜教者，以手搏爲戲，言畢，無一應者。胡不覺技癢，一躍入場，僧卽與交手，往來趨避，不分勝負。約炊時，僧忽揚左足飛胡，胡急閃，順手削其股，僧仰跌場中，痛不能起。從人扶掖而去，萬人屬目，交羨不已。胡亦自得，有老於賈者，謂此輩皆江湖大盜，屢挫辱之，宜防不測。市人咸爲胡危，而胡殊不置意。時已初春，將赴禮部試，覓幼童服役，未得其人，偶於街衢，見老嫗鬻其幼子，年甫弱冠，貌甚岐嶷，以錢十千易焉，攜之入都。童頗慧，能先意承志，胡亦厚待之。一日，出濟甯北界，童以便下車，良久不至，命

輿夫覓之不得。而一片平沙。並無藏跡處。待至日中。乃前行。又數十里。巉巖危徑。草與人齊。見數人坐伺道旁。皆身軀雄偉。裝束詭異。見胡至。環拜車下。則前童與焉。方欲致詰。童已代衆致詞曰。衆兄弟欽慕已久。故先使僕入。奉侍左右。敝廬不遠。還乞辱臨。胡未及答。衆已擁之去。山行十餘里。渺無人烟。及暮抵一處。左右峭壁。中有巨第。門臨河水。通以長橋。橋以銅鐵爲之。滑潤無比。兩旁皆置巨砲。知爲盜窟。衆導胡入門。則燈光人影。喧嘩滿堂。盜衆四十餘人。几筵相錯。見胡入。皆起立。瞪目相向。中坐一老者。碧眼頰顏。魁梧異常。下階相迎曰。夙耳君名。今夕得見。誠厚幸也。胡遜謝而已。老者讓胡上坐。卽命進酒肉。無杯箸。擎壺而吸。割肉而啖。胡左手攜壺。右手持刀。談笑自若。衆相謂曰。胡君真奇士也。酒半酣。老者命舞劍。一人應聲出。掣雙劍。舞於前。白光青影。閃爍若飛。舞畢倚劍立。老者顧謂胡曰。劍法若何。胡曰。尙未尙未。乃拔腰劍起舞。甫一揮。如疾風暴雨。不可向邇。棟梁欲折。瓦石皆鳴。人人遙立却步。胡乃一笑擲劍。衆仰視中梁。劍痕深半尺許。不絕者如

縷相顧失色。乃命人導胡宿客舍。老者親送至階曰：「明日再當領教也。」拱手自去。胡秉燭中宵，轉輾不能睡。夜既深，聞剝啄聲，開視則一女子。審之，卽慧仙也。急詢何得來此。女言家父命僕人接眷至都中，途遇盜，資財盡失。見妾色美，劫之上山，將納爲妾。盜妻不允，乃以爲女。以妾知書，使掌簿籍，頃於屏後窺客。見上坐者君也，知盜將甘心於君，君宜速遁。妾當隨之。乃令胡踰垣出，伺於路旁。少頃，女牽兩馬至，雄駿非凡。皆盜魁所乘，日行千里。女與胡各跨其一，奔馳十餘里，忽火光燭天，羣盜追至。胡連發數丸，老者斃焉。衆乃退。及明抵濟，寓女於客邸，而親訴其事於濟守。則知守已資送女母至京矣。方嚴比捕役，限日獲盜。聞胡言，卽會同營弁入山兜拏。至則屋舍依然，而杳無人跡。守乃厚贖胡，胡偕女入都，備言於父。使告太僕，太僕大喜，逆女至家。親詣胡道謝，見胡胸襟俠爽，神采俊明，益深企佩。自以求媼告胡父，胡父亦喜，卽浼劉太史爲媒，諏吉迎娶。女旣歸胡，敬上和下，咸得歡心。是年，胡成進士，以主事候銓，自經險阻，深自韜晦，不以勇略矜人，而酒闌燈炮，

高歌慷慨，豪氣猶不減云。

王二

劇盜王二，來往山東河南間，其盜也，不結伴，不殺人，不劫人於旅店，亦不破人家室，其行劫也，當於路上攫人之所有，亦無定處，行盜十餘年，官吏莫能獲焉。淮人李武，本農家子，年少多力，後從某僧習拳術，遂以勇武聞，因更名爲武。斯時江淮間多盜，經商者每邀武與俱，則羣盜屏息。武遂以護商爲業，十餘年未嘗一挫折。商人某運資往直隸，邀武偕往，雖數遇盜，武揮之以肱，殊不當意。從此遂執護商業於津京間焉。所獲殊豐，意頗自得。一日受某商人託，獨挾黃金數百兩，由京至豫，行四五日，一日傍午，行至山坡，忽有一人拱手向武言曰：請留下黃金，然後行，不然前途頗險也。李笑曰：君豈不知李武乎？豈畏盜哉？其人曰：若然則不能怪我矣。遂以手擊武，武方抵禦，左足遽加武之腹，武仆於一丈外。其人挈金而走，瞬息卽渺。武自念失金折名，日圖報復，但不知此人爲誰。後悉心訪問，知爲王二，問之

同業者。皆云此人尙可犯耶。遂嗒然自喪。無顏復執舊業。回淮而家居焉。數年後。囊橐漸罄。無以爲生。江淮間商人。常具前相邀。更請護行。武自念江淮熟地。當無有王二其人者。於是復理舊業。某日護商自鎮至漢。受酬金百兩。獨步歸淮。行至潯陽。江村頗覺寂寞。又行一日。抵一村落。茅屋數家。隱約山凹間。武固常往來於此。毫不介意。傍晚寓一店。解銀沽酒。意頗自豪。店主悄謂曰。白銀無使人見。盜可畏也。李笑曰。李某往來江淮數十年。爾豈不知耶。店主曰。君三年不行此地矣。近來一盜。非他盜可比。君焉得不畏。李曰。盜何名。店主曰。王二。李曰。王二耶。遂不言。歸房自睡。黎明起行。未十餘里。遙見前面山崗立一人。恍惚王二。遂折面斜走。王二自後追之。約二十餘里。山角露一佛寺。李急叩寺門投止。倉皇匿一鐵佛後。少頃。王二亦投焉。王入寺。見寺門自閉。有數千斤鐵板自上垂下。正阻寺門。心頗疑之。用力猛舉。而鐵板不動。若另有機械以司之者。周視四壁。皆以巨石爲之。甚堅而滑。約高三丈餘。寺空無人。神龕上坐一鐵佛。身長二丈。頭大如箕。王知非善處。

大呼曰。匿者速出。我與爾俱陷死地。不復刦爾矣。武從佛後出。王二曰。爾非某年在某地被我仆倒者耶。武曰然。王二曰。君亦未必絕無用者。我二人協力。或可出此危險。周巡三四。終覺無計可施。時日正午。射鐵佛上。見鐵佛左右兩臂。若有階級可登。武拾級而上。以手按佛。而頭忽動。武謂王曰。在此矣。去佛頭。中空如洞。下極寬暢。若房若廳。而羅列焉。武與王由佛頭步鐵梯穿佛腹而下。一僧臥於胡牀上。見李武王二。卽起立曰。二君何來。王曰。正來尋君耳。僧曰。甚善。遂以一拳虛映王二之面。王閃過。迎之以刀。僧一躍。立於數丈之外。笑曰。君豈不能白戰乎。王亦笑。擲刀而立。僧驟來如疾鷹。以手抉王之眼。王低頭以手加僧之腹。武復自左側加以足。遂立不穩。僧仆矣。僧仆地大嘯。遙聞人聲嘈雜。武急以刀抉僧之首。俄頃諸僧羣集。約十餘人。長鎗短刀而來。王李盡力禦之。殺其六七。餘皆屈服焉。王李閱其各處。婦女甚多。財帛亦頗巨。蓋此僧本一滑盜也。遂散其婦女與其屈服者。各給與財帛之半。王與李平分其半。二人自經此次危險。深相結納。且改本業爲

商云。

李勇

李勇者年五十許。力大無比。本綠林豪者。獨具隻眼。知此中不可終老。遂洗手不爲。嘗語鄉人曰。縱橫江湖三十年。未嘗逢敵手也。有某縣令新蒞任。得賄右富翁。沒鄉人之田。田鄰富翁宅。遂據爲己有。鄉人訟不能勝。自怨自艾。更恨令不已。而無如之何。事聞於勇。憤然曰。何物暴令敢爾。卽拂袖起。行百里許。日初落時。適令因事外出。隨者甚衆。抵所詣處。住轎。轎忽空。縣令已杳如黃鶴。衆大驚。輿夫更疑訝不已。蓋中途顧未嘗有變也。不得已。且以空輿歸。至署啟輿。令忽在。衆又大驚。問令以故。不答。但作驚悸狀。竟入署。取前富翁奪田案。提富翁至。令歸其田於鄉人。出所受賄充公。並重責富翁。翌日。李勇欣欣然還。人有以令事問者。但微笑不言。然人咸知鄉人之冤。非李勇莫白也。

白蘭花

淮上周海門豪爽士也。不詳所自。以隻身商於淮。不十年致素封。坐中食客常千人。士之踵其門者。雖一技一能。必溫顏接之。延之上座而厚款焉。倚山建客邸數百。編號爲之。客之來者。以次就宿。如歸其家。又善於縱橫捭闔。貴戚權要。皆通路遺。地方長官有疑難事。能爲解決。復殷於任卹。里鄰有急難。周濟無不應者。以故上下皆稱服之。當專制之世。頗豪侈自若。清嘉慶中葉。漕督某素剛鯁。惡而劾之。三疏不動。一日。漕督忽自至其家。置酒飲宴。歡若兄弟。一時大以爲怪。久乃度其奧援之有自也。賞春日。飲客花下。與客縱論古代。旁至近今豪傑。因及劍俠。海門拊案曰。吾聞劍俠之術。亦非所難。而環顧當世。乃寥落如曙後星。何也。諸君閱歷海宇。亦曾有此遇否。座有少年。新自南中來者。起而對曰。有之。且嘗見一面。蓋其人在縲絏中也。海門亟問何人。客曰。其人不知姓名。或謂爲鬱林州人。其入人家。無冬無夏。臨去留白蘭花一枝。不知其所自得。世所稱白蘭花者也。衆請畢其說。客曰。白蘭花無居止。無蹤跡。人往往無意遇之。卽求之。則又不可得。庚午之歲。東

江大水，漂蕩以萬計。請於官，官不肯賑。某董事者，倡募義捐，而應者寥寥。董事夜寐，置捐冊於案，明旦失所在。而瓶中插白蘭花一大驚。越三日，有人持捐冊來，且促董事往任散賑之事。董事素識其人，問所從來，曰：途中有人以此給我，囑來相邀。且云待於河干。董事視其簿，則平日所號爲老慳者，皆樂輸千百。最後則不肯認賑之某官，亦居然捐白金八千。且蓋有縣印也。於是趨而前，至於河干，萬鍾之粟，千鎰之金，已立具。萬衆歎呼，聲如雷動。事後追問，莫知其由。以意度之，其爲強迫可知。自是白蘭花之名大噪，巨室豪右，中夜常無故自驚，以爲至也。跡之爲朕兆。某將軍以海寇發，率師船巡海。一夕，舟泊虎門，卽座艦宴客，妓女數十人，左右擁抱，將軍宴罷，留妓侍寢。月明之下，旗旆飄揚，戰艦一字雁列。此未來之韓蘄王梁夫人，乃高臥於中軍帳內，樂可知也。無何，將軍早起，則白蘭花儼然案上，大駭。久之無異，疑而遍檢舟中，皆無形影。已而印印，印字已磨漶不可見，而別刻篆文粉侯二字。將軍之募賓識之，以告。將軍大怒，然祇得閱之，而潛召工，更摹刻焉。又

某星使過境。其髮辮亦無故自落。而得白蘭花枕畔。星使怒且懼。以讓制軍。制軍不得已。則以他盜爲白蘭花也者。縛於市。將殺之。以解於星使。未行刑。忽一偉丈夫趨而前曰。我真白蘭花也。妄殺何爲。衆執之以見制軍。是時一城之人。聞真白蘭花之被獲也。爭先覩爲快。所經之地。市肆街巷屋瓦梁棟上皆人也。當時某因得一面。惜相去過遠。未能明晰耳。制軍訊之。大笑不諱。患其遁也。帛裹其周身數十層。而繞以鐵絲。寄獄一夜。明日命行刑。行刑之日。觀者尤衆。囚忽呼曰。我非白蘭花也。冤哉。奈何殺我。官曰。若昨日固自以爲真者。何今日之假耶。豈畏死乃爾耶。囚曰。冤哉。我獄卒也。昨日白蘭花入獄。我謹視之。天將明。倦而假寢。及醒則在刑場中。是誠冤哉。官使人視之。果獄卒也。因釋之。自某制軍督粵。摧抑豪右。善撫其民。而海寇亦息。一夕。各大小官署。悉得白蘭花辭別。啟云。僕之所爲。制軍皆能代爲之。粵無須僕。今去矣。嗣是不復見。於今蓋十三年。頌之者蓋以爲仙去也。海門掀髯曰。渠肉身豈有仙理。會當在人聞耳。酒闌客散。少年獨請問。海門延入內

室岸幘迎笑曰。君真好眼力哉。客曰。僕頃自羅浮來。有某和尚矚爲寄書足下。云今爲東南一有名人物。竭來徧歷江南。無所遇。至此地固疑是君。今果然矣。海門閱書竟。默無一言。越三日。大宴賓客。召家中司會計者。盡稽覈所有產業。及一切盈虛虧長之數。延少年上座。納管鑰簿籍曰。吾師召我矣。吾將往從之於白雲深處。所有財產。請君暫主之。十年後。或當見還耳。召諸婢僕羅拜於庭。指少年曰。此汝新主也。其善事之。海門本無妻子。惟一十四歲女。至是父女各跨一白驪。從容徑去。座客起送之。而驟行甚疾。竟望塵莫及。少年者北海蘇超也。亦不羈士。家無父母兄弟。好遊獵馳騁。至是遂居之不疑。其豪亦如海門。越十年而河決於豫。民多死。帑金不繼。蘇慨然曰。周君所謂當還者。其在是乎。悉數其產。尙得七十萬金。盡以佐大工。合龍之日。蘇邀賓客。置酒堤上。欣然舉杯曰。吾今可以報周君矣。忽外來一客。敝衣布襪。而神色灑如。徑據上座。衆異之。與語亦不甚酬應。酒酣。上座客攜蘇手。至堤畔散步。衆不爲意。俄聞人呼曰。蘇君投河矣。衆聞聲出視。則蘇與

客方微步凌波。時北風迅厲。河流絕急。兩人聯袂徐行。絕無沾濡。洵異人哉。

張青

北道之上。昔年馬寇最夥。尤以魯豫境爲更甚。有趙某者。爲上邑縉紳。頗饒於資。然慷慨好義。非鄉愚守財者比。會趙女于歸有日。趙攜資晉省。備辦粧奩。中途遇一闊面大漢。負小行囊。一趙行則行。趙止則止。初見之下。深爲詫異。旣思此種行爲。必係路道上朋友。少川資耳。於是趙每於飲食間。輒邀與俱。而某爽快豪放。亦未嘗稍辭。逮將抵周口鎮。夜宿小店中。某向趙曰。沿途渥承厚遇。久已銘感無旣。某姓張。名青。綠林中人也。公行囊中所帶之金。某已偵悉。所以不卽劫取者。感公之義。特不忍耳。雖然。明日到周鎮時。某有急需。非二百金不敷。公能允吾。償當不爽。趙畏張之強。不得不實言相告。並語以晉省原因。萬一有誤。殊難爲計。張云不妨。明日公可先行。某隨卽至。諒此區區之款。不致誤公。希公告我寓址。俾便尋覓。趙無法。與之金。且告以寓廬。遂自往焉。抵汴之次日。客牕獨坐。正鬱鬱不自得。而

張歛然至。笑顏向趙曰：別來無恙耶？曷戚戚爲。前日所約，幸不辱。某今請倍償之。望公哂納。趙初固辭。張固請之。始受。張又曰：我輩綠林中人，空手劫財，行固不義。然商旅之財，某等亦未嘗妄爲染指。至貪官污吏，剝削小民，充裕私囊。途中一遇某等，十九不免焉。某等此番所攜金，正某縣令貪囊中物耳。臨別，贈趙袖劍一。囑云：珍視。返時設遇不測，以此示之，可免。後趙歸，沿途皆賴有此焉。

異人

乾隆間，蘇城西十里外，龍山畔，有異兄弟十人，俱武藝絕世。能渡河不用舟，躍如飛鳥。力舉千鈞。首曰楊子園，善使雙鍊鞭，重百斤。次曰甘逢池，善使丈八矛，席文生。白泰官，俱善齊眉棍。其六人姓氏忘之矣。楊公家有數畝園，曰楊園，依山傍水，亭閣絡繹。有一池，暗通蠡湖，故水活而魚多。夏日荷香遠送，清氣襲人。其花白紅相雜，大如盆。池邊有小石橋，上可通山巔。橋邊一閣，最高，凭闌可望太湖景。下植花木叢雜，園有草籬，內多異種菊，黃色最佳。十人恆飲酒於此閣。一日衆飲酒，月

下醒後渴。皆思菓品。子園曰。須至洞庭方多。但此時波浪甚險。不能前往。內有某曰。吾敢卽飛步水面而去。刻許至洞庭山下。大踏步而入。但見春梨紅橘柚。離離滿樹。頃刻隨手盈筐。煥燦下山。見壑坐一少僧。手持銅鉢。某異之。詰僧何來。僧不答。再窮詰。僧置若罔聞。某怒欲撻。僧亦勃然舉鉢飛來。疾如電。某手接之。又飛一鉢。又接之。僧驚惶跪哀曰。敢問豪傑何名。某自述其所以然。僧聞之。拜求饒命。某曰。妖僧不屑殺。恐饒之在世竊狗肉吃耳。欲以鉢破其腦。僧哭拜不遑。戰兢如喪家狗。某曰。姑恕之。僧疾馳而去。後九人因某久不來。恐中變。手持器械向湖面接踵而來。詣山下彼此相遇。各訴一是。子園曰。此僧不可饒也。踰數年必有其師來。恐吾等非其敵手也。某曰。吾何畏彼哉。此僧如此哀求。已非豪傑氣象。可知其藝平常。雖青出於藍。而藍未有勝於青者也。子園曰。子大狂暴。不知心卑而能耐勢者。真千古之梟雄也。今僧武藝未精。其不能摩鍊乎。後必子受其敵。吾爲爾憂之。某狂笑不答。衆方掬菓食之。由水面歸。波勢洶湧。如履平地。頃刻歸。數年後。十人

夜游湖中馬山。見山嶠有一老僧。持鋏拐掛一鉢。貌古怪。披百衲衣。後小僧手持一拂。草徑步行。月映松林。隱約不得詳視。子園曰。此處胡來隨緣僧也。不數武。近在咫尺。某曰。小僧卽前日之所見者也。子園曰。果不出吾之意。子今將何如。某曰。雖千萬人吾往矣。何況二人。振衣前往。僧見之曰。子非饒弟子之某乎。某曰。然。僧曰。今敢與弟子試武乎。某曰。吾不怯也。小僧仍飛銅鈸。某以械揮之。小僧又飛一鈸。其法異於常。某不能禦而傷臂撲地。子園怒。揮鞭力鬪。小僧敗走。子園以箠手鞭。而小僧傷氣絕。老僧驚。遂以鍊杖戰。老僧力弱不能勝。遂以鉢飛擊。子園鞭舞如飛雪。鉢着鞭墜山下。老僧驚。合掌曰。敢問將軍姓氏。子園一一述之。老僧敬服。乘其怒氣未息。疾趨將老僧一刺。老僧如不覺。又刺。覺老僧身堅似鍊。心訝異。遂問其自何所來。老僧曰。吾自穹窿山煉氣。已百餘年。日前使弟子四海采藥於洞庭山。遇某妄顯武藝。幸某饒之。貧僧故特來一試真實。不意將軍果強。今弟子已斃。某又傷。奈何。然爾等徒有力強。不知煉氣。力強不過戰鬪。煉氣則體堅可成仙。

也。今二人雖如是。吾當救其性命。衆聞之驚喜交集。老僧手招山下鉢。隨手飛上。鉢中檢出紅丹二粒。與某口頷之。傷乃瘥。與小僧頷之蘇。十人奇異。遂有願煉氣之意。謂老僧曰。吾等可煉乎。老僧曰。凡事在心。有志則竟成也。何慮不可乎。如願。隨貧僧入山。僧當教之。於是十人隨之而去。至今寂然。蓋成仙矣。咸豐庚申兵燹後。楊園亭閣蕩然無存。山色水光。依然無恙。池荷花香亦未減。凡花卉點綴處。惟荒烟蔓草而已。聞楊某右手雌鋏鞭。重七十斤。尙在園內焉。

高二爸

高二爸。寶坻人。爲捕役。藝絕倫。盜相戒不敢犯其境。歷任令頗優禮之。年七十餘。屢求退。令不許。會武清有盜拒捕殺事主案。捕不能致。令訪知高。遣僕卑禮厚幣以聘。並函致寶坻大尹。以卹鄰大義。婉致之。高不獲已。敦迫而去。至某處盜窟。其渠迎之入。令其下劇盜二三十人。一一謁曰。爾等皆非二爸敵也。問來意。曰。二爸亦太多事。我等相戒不犯公境數十年。今又理越境事耶。二爸曰。我來不獲已。因

歷述武清令禮聘狀。邑令敦迫狀。且曰。我年已七十。既敢來此。數莖朽骨。尙自惜耶。不得案中人有決一死鬥耳。渠曰。遠來大不易。且共飲。羅列酒肴。延之上坐。酒三巡。獻肉一盃。一盜曰。我欲敬二爸肉一方。敢食否。應曰。敢。盜持刃之銳者。刺肉置高口。高張其口承之。盜并力戳。刃穎已爲齒所格。力既竭。不能進毫末。拔之亦不能出。相持逾炊許。渠曰。休矣。敢不令案中人隨公去。高張其口。盜持刀坐數武外。洗盞更酌。三更向盡。飲噉畢。卒獲二賊歸案。邑侯員家駒榜其門曰。勤公勵俗。年八十餘卒。回部之尊稱曰爸。高回人。至今人呼高二爸云。

檻中人

孫孟孚。邳州人。官雲南雲龍州刺史。喜音律。善技擊。以骸掃地。作旋風舞。地磚碎如粉。自言幼以善病廢學。一日行大道上。見徒役甚衆。解檻車行。檻中人美秀而文。眉如劍。有英氣。指爪長數寸。雙眸湛然。意不類凶盜。尾至旅舍。問解役。知爲翻供。解回復訊者。夜聞歌聲清婉。合拍。察之。檻中人也。因問其何如人。不答。云日見

君亦有心人。能隨我行乎。孫諾之。偕至縣堂。縣尹出問。對曰。廉訪某。頗清正。且遇我厚。我不忍以去累之。汝身居民上。貪庸陋劣。何以官爲。語未畢。銀鐺在地。杳不知其所之矣。官吏噤齟。色如土。將閉城門。大索。孫急逸去。至城外。檻中人坐而待。問之。知爲劍俠。乞從去。至深山。精舍幽雅。請其藝。口吐鉛丸二。飛作匹煉。光如龍。周上下四旁。變萬狀。旋復手中爲兩丸。吞之。孫請爲弟子。曰。子功名中人。學此無所用。傳汝拳勇。可愈病。兼保身。遂盡授其技。暇則教以度曲。分秒合度。崑山老梨園。無以逾也。學成。送之出山。卒不告以姓名。後孫思其誼。入山訪之。迷不得逕。悵悵而返。

八大劍俠

大江南北以劍術鳴者八人。約爲侶。甘鳳池其一也。王葑亭先生曾爲之傳。鳳池。金陵人。短小精悍。髯如戟。張手握錫器。鎔如汁。從指縫中流出。然在八人中。尙居末席。第七人爲白泰官。常州人。技不如甘。而縱跳矯捷如飛。人不能近。第一爲

僧某第二則呂四娘。僧淫霸無行。荼毒善良。七人咸惡之。思除僧以自滄雪。然度藝不能勝。恐轉爲所戕。乃謀六人合圍之。鬪半日。白從空飛下。以刀刺僧首。僧若弗知。鬥如故。白條又飛去。六人麇集。如是三。乃殲僧於地。七人各散去。以技雄一方。然矢不作蔑理事。至今談者稱之。

俠史氏曰。甘鳳池居第八人。則七人之技可知。僧之技更可知矣。顧不善用其技。卒以自戕其身。技雖絕。何尙焉。中四人名姓不傳。益令人想像於吳山越水間也。

竹劍化龍

四川典肆常質古董。一日有客短衣虬髯。持匣緘封甚固。索二百金。主者請開篋。觀其稱否。客曰。此吾至寶。因有急需。三日來贖。篋不可開。開不利主者。主者曰。不見物。何以質錢。客曰。必欲觀之。卽亦無難。因啓篋。竹劍一。橫八分許。長尺有奇。主者哂曰。此何物。直多金耶。客曰。無輕視此物。人自不識耳。持劍一晃。化爲龍。乘之。

夭矯凌空而去。篋至今尙存。

宋四娘

嘯崖大令那斯揮。甲寅孝廉。弱冠時。隨其太翁官浙。常游尼菴。遇寄居女子。自言爲宋四娘。少年孤露。流落江湖。窺其居。聾媪在焉。打包之外無長物。問所藏何物。曰劍耳。問精其術乎。曰頗學之。願爲君子一試其技。延嘯崖上坐。結束爲急裝。竦身立。初舞。一片白毫光。如銀毬旋轉。渺不見人。繼而周承塵四隅。如白練一條。條左條右。不可端倪。時夜漏三下。燈光深碧。方目眩神悚。疾如鳥墮。女子已立面前。亭亭如不勝衣。仍不改如蘭之息也。復曰。君子氣宇不凡。將來必遠到。能以筆墨傳予之技。感且不朽。約次夜仍會于菴。將有所語。次日。其翁訓以課。不得出。越日訪之。已逝矣。

尸化膿血

康熙時。某督以重貲歸里。慮有盜警。募健者護之。某甲年弱冠。美如玉。甲爪長數

寸應募往。每至逆旅。解騾綱。堆篋滿地。某甲少飲。倚壁假寐。劇盜十人。由江南尾行十餘日。不見少年動靜。未敢妄發。至山東境。羣謀曰。今夜不劫。越境卽不得發。以其渠各有成約也。夜分。藝最高者一人先入。啞然號。旋寂無聲。次入一人。又入一人。胥如之。七人曰。質明入室。以殺人訟。味爽共入。惟少年及銀篋數十。尸則杳然。少年呼騾綱從容去。七人惘惘。至午。見室中央磚。似新填者。啟之。見亂髮數團。膿血三四而已。

俠史氏曰。聞劍仙殺人。以藥屑滲之。化爲水。某甲豈其流與。又聞必忠孝者。乃能得其傳。不許妄殺人。妄殺人必遭雷劫。如唐人所傳紅線聶隱娘輩。今尙有其人乎。何不出而掃盪軍閥。爲國家宣力也。

雍正失妃

雍正妃子那特拉氏。明眸皓齒。貌媲西施。賦詩吟詞。才同蔡女。艷名喧傳。聞於朝野。時俠客馬武。佔據東海桃花島。設險守寨。儼同王府。其宮室之華麗。直不下於

未央燕女秦姬。被其擄者。充塞下陳。不知凡幾。探聞那特拉氏美。潛行進京。設法攝取。挈回島中。藏於金屋。得此國色。寵愛異常。雍正亦俠客。妃亡如失。左右手。悒悒不樂。私出探訪。尋至島中。伏在瓦上。覘之。見馬武擁妃於膝上。飲酒取樂。目擊此狀。怒氣直冲。但深入虎穴。恐非敵手。默繪馬形。怏怏回宮。命俠客郭某。假裝妃弟。持圖往探。郭至島。見桃樹遍地。行近宮側。適遇妃與衆女在外。翺遊。郭因上前認姊。妃知帝所遣。僞應之。偕返宮中。詢悉來意。未幾聞鈴聲。央央。妃曰。馬來矣。伊身繫鈴數枚。十里外已聞其聲。我須與衆女出迎。爾藏於壁後。相機行事。馬最愛妃。先至妃房。問曰。有生人氣。妃知不可隱。因言伊弟在此。郭挺身出見。馬曰。我知來意矣。索圖閱之。曰。根據地已被識破。吾其爲田橫乎。請限三日。與子同行。馬乃處分所有。以銀錢與丁壯。以珠寶賜婦女。火其宮。偕郭與妃而去之。未至中途。自刎而亡。妃乃還宮。

甘鳳池

甘鳳池江南八俠之一也。嘗雲遊四海，好爲英雄豪傑之事。雍正帝屢招之，不從。深銜之。時直隸通州府有富戶鮑金貴者，有一女曰銀花，沉魚落雁，閉月羞花，不啻也。附近有劇盜竇寶義者，混號花花太歲，偶經其門，見而悅之，遽使強迫下禮。鮑金桂驚駭交併，無計可施，而竇寶義選擇吉期，卽強來迎娶。金桂衆寡不敵，被毆傷脅，伏地不起。一少年來扶之起，叩其事，不勝忿怒，卽抽佩劍奮勇追之，殺賊無數。竇寶義大怒，反兵圍之，遂擒少年，縛之柱，將剖取其心以下酒。少年嘆曰：蔣漢傑、蔣漢傑，汝一世英雄，不圖今日乃死於賊人之手也。一盜持水盆，啣牛耳刀，解衣欲刺，一鏢突至，中其手，刀落地下。牆上躍下一人，武巾利劍，目光炯炯，英氣逼人。殺盜首，遽解其縛。少年搶得大刀一口，遂共殺而出。盜魁聞變，集衆來戰，其人大喝曰：無知小寇，認得俺江南大俠甘鳳池否？揮劍直前，人頭亂滾。竇寶義亦被殺。乃令少年與鮑銀花各乘騎而歸。鳳池旋即他去。

白太官

白太官亦八俠之一也。技藝高於鳳池。嘗間遊市上。有惡僧以鐵羅漢一尊。重約五百斤。恃強惡募。有不布施者。卽以鐵羅漢置櫃上。櫃力不支。格格作響。主人懼。則饜其望以去。至某典肆前。強化百金。典主不允。僧惡募如前。許五十金。不可。白過此。見櫃前有鐵欄杆。以指輕劃一過。欄皆斷折。笑曰。區區頑鐵。乃不禁我指之一劃耶。惡僧見之。大駭。曰。請問居士高姓大名。白笑曰。余乃白太官也。遂將鐵佛欄腰一劃。立分爲二。曰。上人以此何用。卽揚長而去。僧面赤。持鐵佛徑去。越年餘。市上復來一異僧。問白太官之名。徑造其廬。問白太官曰。太白官在否。白太官時在庭中。卽手捧滿盛清水之七石缸二。由地舉起。緩步而行。答曰。吾師頃已外出。不在家中。倘有所白。當爲轉達。僧曰。汝係何人。白太官曰。我乃白太官之徒也。僧念其徒之勇武。尙如是。則其師之技藝。自更精造矣。遂斂容而退。僧蓋惡僧之師。亦非常人也。自是白太官遂遊京洛。與了因和尚甘鳳池等。同以劍術爲太陽宗之護法。上甚忌之。

醜婦

洛陽馮可舉。膂力過人。尙俠好義。專喜爲人代雪不平。嘗騎馬出行。天黑如墨。錯過宿頭。自度不可前進。乃至一村莊求宿。只一老嫗應門。延入草堂。狀殊孤悽。因問曰。家中尙有何人。嫗曰。有一子。已早世。僅一媳婦。撐住門戶。問媳婦何在。曰。在山中打獵未回。言下吊下淚來。可舉乃倚劍而立。命嫗治晚餐。須臾。門外一女子負黑虎。置庭中。見繫馬。驚問爲誰。可舉出見。婦面黑奇醜。厥狀幾若山中之獼猴。而目炯炯有光。因曰。小子偶失途程。幸到寶莊。敬求一宿。醜婦曰。既是貴人遠臨。便請入內少坐。因以手拉可舉之臂。可舉痛不可忍。驚曰。如此醜婦。竟有力至此。適使犯觸。我身齎粉矣。遂隨之入。抽可舉之劍。視再三。笑曰。客亦好此乎。可舉曰。非能之。亦不過聊以自衛耳。婦請試之。馮乃開一四門。婦似不甚介意。但曰。技亦可觀。因自拔其所佩之劍。婆娑而舞。寒光閃礫。石轉沙飛。目眯不辨人影。久之。光收霧斂。持劍而笑曰。獻醜。此袁公術也。時八卦教匪李文成。猖獗於滑縣。殺縣官。

強克捷而入犯禁地。可舉乃以言挑之曰：夫人具兼人之勇，擅絕代之技，當此亂民擾攘，曷不投身行旅，以爲地方造福耶？婦笑曰：蠻夷猾夏，夷夏之防久疎，今雖擾擾肉食者鄙，自能謀之，又何勞我輩女子爲之代庖乎？遂捧酒肴出餉客曰：山野村蔬，勿嫌簡褻，可舉稱謝。天初明，婦起秣馬，爲客治餐，可舉厚酬之，不受，乃鞭馳而去。後可舉以軍功爲山東參將。

桐鄉孀婦

桐鄉女子李珍姑，年三十餘，頤而黑，邑有楊生振成者，中年喪偶，因聘而續膠焉。娶年餘，振聲忽遘疫死，婦哭之痛，因遁入空門，青燭禮佛。有老婦授以劍訣，深自韜祕，故外人鮮有知者。有馬生者適喪偶，感其行，竊使人風示之。婦辭焉曰：未亡人雖貌寢，所差堪自信者，一德字而已。今一朝而事二夫，其如名行何？馬生聞而賢之，謀之益急，而婦卒不可奪。旣而馬生忽卒，婦親臨哭吊，馬家無戚黨。死後里中亡賴，欺其弱小，悉憑陵之。家中財物，携取一空，又擬瓜分其田產，僕厮等亦各

草竊以去。惟一嫗抱兒哭帷中。婦詢得其故。忿不能平。知姚生與馬生甚善。因往踵門而說之。曰：所貴乎朋友者。謂能患難相扶也。今馬生死。子尙幼穉。撫孤之任。未亡人願請負之。禦侮之責。則先生不能逃也。請以紙具呈於邑宰。追還其遺產。以存孤弱。姚生許之。亡賴輩聞其議。多方恐嚇。將以白刃相加。姚懼不敢出。婦聞事已中止。益忿不可遏。卽銳身自詣於官。官憐之。窮治亡賴輩。亡賴輩怒。邀擊於途。將殺以滅口。且以洩憤。逼之甚。婦乃袖出小劍。白如霜雪。振臂一揮。當者盡死。乃遁入山中。歲時以粟帛存問馬家。養其孤弱焉。

黃山老叟

休甯程君才。少年倜儻。喜技擊。以案株連。亡入山間。天晚昏黑。不辨路徑。遠望有燈火之光。射出林外。因趨赴之。一老叟候門外。便揖之。請求借宿。老者自言姓陳。問何自來。程以實告。老叟有難色。旣而曰：君已娶乎。程曰：尙未。老叟喜曰：如此尙好。某有甥女。年二十矣。尙未字人。意欲擇一良人而終身也。今觀子。雖在縲絏之

中。非其罪也。倘荷允諾。當令侍奉箕帚。程曰。非敢違命。實以有罪之身。深恐有累大德。敢請辭也。叟曰。某之出此。雖爲甥謀。實卽爲君謀也。姊夫譚維清。曾得許君術。造詣甚深。但已久不聞問世事。君如與甥女謀之。得其允許。當可護免。程喜出望外。遂留餐焉。女貌殊婉麗。程恆對之歛歛。女曰。妾雖賤陋。未有失德。何致遽遭嫌惡。程長揖而請曰。夫人靜慧。某何他求。所可慮者。罪人之身。未逢赦免。將來竊恐有負小姐。是以泣耳。苟能設法成全。敬求援免。女嘆曰。事已如此。尙復何言。家君遁跡山林。久謝塵世。今姑一往哀之。或可有望。乃同詣黃山。相將而入。有草庵一。結構殊草草。中坐一老叟。鬚髮已斑。兩旁各立一童子。執拂以侍。女力率程。趨前叩拜。細訴前情。老叟嘆曰。小妮子。亦太累人。可速去休。隨喚童子。授以錦囊。曰。汝去爲我了此一重公案。童子稽首下山。程生夫婦亦卽回去。靜聽好音。越數日。果傳聞案已撤銷。蓋邑宰曾於前晚。在枕函旁。得一手書。并附七首。略謂某案與程子無關。何得妄致株連。如不將案撤銷。早晚定決爾首。下署黃山老叟之名。令

得書。旁皇殊甚。遂以硃筆圈去程名。於是夫婦相慶更生。歡愉不可名狀。

馬天驥

瓊島孤懸南海。花木清幽。風景極佳。有潮州俠士。曰馬天驥者。聞其名。掉舟而往。至則薔薇正開。嫣紅萬紫。香氣宜人。馬顧而樂之。乃開酒饌。引觴自酌。苦無同伴。忽亂紅深處。一絳服女子。自云倩倩。明眸皓齒。蘭麝芳流。見馬且前且却。以巾掩口而笑。馬戲挑之。亦不甚拒。遂相褻狎。亡何。天色漸晚。忽然一陣腥風。落花如雨。草木皆偃折有聲。女急推馬起曰。夜叉來矣。馬束帶旁皇。避入花底。須臾。果有一巨人至。長逾二丈。張口如箕。兩目如炬。灼灼有光。齒露唇外。排若利刃。聞有生人氣。遽欲搏噬。天驥大怒。奮衣持劍。突起擊之。中劍而踣。遂躍登小舟。倉皇而遁。

● 民國之劍俠

愛國熱血

民國成立。有徐姓老叟。不知何許人。性慷慨。家頗小康。惡世亂。隱居鄉村。優遊自

在桃源避秦不啻也。一日，叟正坐溪旁垂釣，忽有兩少年至前，鞠躬而言曰：荒郊無處投宿，欲假貴廬一席地，暫作休止，可乎？叟曰：是易事耳，惟敝廬不潔，恐屈辱耳。言訖，遂導客入室。晚膳後，叟入內，一夢醒時，已交四鼓，見客室燈猶未滅，心大疑，躡足至窻前窺之，見兩少年正伏案畫地圖，且畫且語，視室中壁上，懸有假辯二，叟恍然大悟，私忖彼兩人者，係外人喬扮華裝，潛入內地測繪地理，而爲將來作戰計畫者，此而不除，必有大害於吾國也。盍手刃之。遂拔劍入室，猛刺少年之胸部，少年倒地。斯時彼一少年，見事機危急，突出手搶，砰然一聲，一彈中叟肩部，叟猶握劍猛刺，劍洞其胸，少年仆。尙開槍回擊，彈中叟之胸部，叟亦仆。縷縷愛國熱血，從要害噴出，勢若湧泉，家人聞聲趨至，見二人臥血泊中，而叟面猶現笑容云。

李老五

直隸南安縣姚小棣，以待詔爲業，娶妻李氏，雖小家女，頗知禮節，待詔於民國二

年患消渴而卒。里人憫李氏之賢，爲之乞憐富人，每月貼錢若干，以濟其住食。鄰有陶三，無賴也。李氏素不與交言。一夜郵至，詢訪李氏。陶三遽接其信，俟郵差去，逕叩李氏之門。李氏問何人來此何事。陶三以送爾母家信對。李氏信其誠，啓其門納之。陶三代拆其信，誦與李氏聽。故意解釋，延挨時刻。李氏覺其意，謂之曰：「夜已深矣。我是寡婦，瓜田李下，人言可畏。請明日來談。」陶三流連不去。語言之下，漸涉游詞。李氏至此不耐，厲聲下逐客之令。陶三惱羞成怒，隨出小刀一柄，威嚇李氏曰：「依我者生，不依我，請吃一刀。」正在難解難分之際，忽簷角墜下一人，啟窗而入。呵陶三曰：「鼠子敢如是。」陶三作色言曰：「此是老子禁臠，吹縐一池春水，干卿何事。其人知不可理喻，乃擻陶三於地。陶三極聲叫號，其人不得已，力刺其腹，而陶三死矣。其人仍自天井中飛上屋頂而去。鄰人聞聲來視，見陶三被殺，咸怪李氏之忍心出此。李氏急以情形告衆，衆頗直之。而苦於殺人之人，不知所在，無從作證。須臾，陶三家人至，指爲李氏所殺，控諸法庭。審判官知李氏非殺人者，而陶三

平日之行爲頗爲人所指目。於是懸案而不斷者一年有餘。一日其人至。自云精精子。某夜路過此。忽聞男女撐拒之聲。躍下而爲此事。歷歷述當夜之情形不爽。問官嘉其義。乃赦李氏而定其人徒刑三年。某夕忽飛去。其人姓名。究未知其詳細云。

趙乙

民國初元。無錫縣城中。典庫後有曠園。大逾十畝。忽有壯夫負竹篙一竿。修而多節。白司事者。求寄存園中。訂日來取。詰旦。汎埽夫趙乙見之。問司事者。此篙從何而來。司事告之。趙太息不語。司事察其言狀有異。轉詰之。乃曰。小人向日流蕩江湖。略知暴客號訣。此篙卽若曹信物。數節之多寡。便知黨羽人數。今倚園牆西隅。其來必由此處。是不可不預防之。司事聞之。大驚。趨告主人。衆意乙非常人。因謂汝既知此篙。必能辦賊。果爾。當重賞不吝。乙初不肯。再三央之。乙乃數篙節。凡三十有三。曰。賊數如此之多。非以計殲之不可。衆問計將安出。乙笑曰。公等勿慮。小

人自有料理。乃請買豆數百石。攤布園中。約厚尺許。又買大甕三十具。置牆下聽用。主人如言部署。一夜。天月陰黯。乙謂衆曰。賊至當在今夜。小人當一一殲之。公等如膽大不畏。請作壁上觀可也。主人駭懼。恐乙衆寡不敵。出資募健兒百餘人。各持器械爲乙助威。乙麾之去。曰。爾曹鹵莽無能。在此攪擾。徒亂人意。請速去。勿敗乃公事。悉命舉室吹滅燈燭。自袖利刃。潛伏牆陰以伺之。少選。竹篙窸窣作響。一莽男子。自竿溜下。足踏豆上。滑而顛。乙暗中以刀剝其首。擲甕中。未幾。一人繼下。顛如前。又剝之。連剝十餘人。外賊以其黨多人入牆。寂不聞聲。慮內有備。中一點賊。躍登牆上。次且不敢下。俯首窺察。良久。輕拊其掌者。再內無應者。知事敗。遂率餘黨遁去。無何。東方漸明。乙招諸健兒。置尸甕中。計之。共剝十有六賊。命悉昇而瘞於野。以滅其跡。主人大喜。厚犒諸健兒。自是除乙汎掃之役。待以殊禮。惟時惴惴焉。慮盜復來報怨。而盜竟不敢再至。

情俠

春日冲融。春光駘蕩。春意芊綿。春蜂春蝶相撲逐。時爲三月上巳日。煙絲草翠。柳
鞦花嬌。士女如雲。相率踏青去。鬢影釵光。爭妍鬪麗。紫陌紅塵拂面。無人不道看
花。

聖情生以是日。服春服。從奚奴。遨游郊外。或登高眺遠。或臨淵羨魚。或坐綠楊深
處。看黃鶯作對飛。時晴空一碧。清風徐來。天桃數株。點綴於青巒翠壑間。恍如十
丈錦屏。光華奪目。縱心目之所如。疑置身十洲三島。迥異軟紅塵之五濁惡世。不
覺色相全空。根塵不染。有天際真人之趣。

旅行之際。忽覩一油碧香車。中坐二八女郎。青衣數輩。款段以從。斜睨之。意度嫺
婉。美異常倫。天人也。心旌搖搖。目逆而送者久之。而彼姝者子。亦秋波一轉。宛委
含情。益目眩神奪。瞻戀弗舍。而雙輪不作美。一刹那頃。已送玉人嬌影。歸於無何
有之鄉。佇立移時。惘然若有所失。遲遲而行。嗒焉似喪其偶。

行次。念僮爲土人。當知其身世。因垂詢焉。僮曰。是爲前清鳳明府之女公子。居於

蓮花巷。距余家僅數武。婢媪傳其名曰蓮儂。不知真歟否也。生默誌之。自此方寸靈台中。遂闢一蓮儂之位置。而情天之造化小兒。乃播弄其顛倒生人之狡獪手段。

及歸。挑燈獨坐。忽忽若迷。新月一鈎。籠茜紗窗上。光線柔弱。如輕煙之一抹。益增無量之悵惆。欲藉書籍以戰情魔。而中心不能自主。遂怏怏趨榻臥。甫就枕。即昏然睡去。而蓮儂情影。猶往來於黑甜鄉裏。縈迴於魂夢迷離中也。

蓋聖情生。雲其姓。倩其名。姑蘇人也。嘗挾資漫游天下。愛蜀之佳山水。遂居焉。美姿容。擅才華。內秉堅孤。非禮不動。每當朋從游宴。觥籌交錯之際。粉白黛綠。錯落其間。他人皆喧聒若喪魂魄。生容順而已。嘗自言曰。情之所鍾。正在我輩。余雖非太上忘情者。然亦不敢濫用吾情。擲節之。珍貴之。將有所待也。人遂字之曰聖情生。生亦引以自號焉。至是陌上相逢。舉帷一笑。情絲一縷。天半飛來。不知不覺間。遂繫於消魂獄內。

韶華逝水。已是暮春。時交子夜。沉沉院落中。雨聲淅瀝。若泣若訴。一燈如豆。冷照蕭齋。更覺無限淒涼。和衣竟臥。反側逾時。始蝶夢蘧蘧。嬉游於華胥國裏。翠晨鄰院。剝啄聲喚醒南柯。驚起出視。則紅日一輪。已上曲牆簷角。莽天公有意。斷送此黃金世界。荼蘼開遍。杜宇聲聲。落花無言。黯然而作消魂色。盥沐既畢。濡毫填意。難忘一闋。以誌殘春。其詞云。

子夜歌休。悵鶉啼碧血。鶯咽珠喉。風飄紅杏雨。夢斷綠莎洲。情黯淡。意綢繆。誰與話溫柔。最難忘煙花時節。香滿枝頭。無言悄放簾鉤。被玉笙吹徹。渺渺余愁。窗搖金屈戍。枕冷玉雕鏤。空宛轉。歎淹留。無計遣離憂。沒奈何。燒殘銀燭。數盡更籌。

書竟。欲振衣出游。以餞此垂去之春日。忽聞門上客鈴振振。嚮亟出迎。則舊友溫玉如也。揖入。適新詞在案。墨迹淋漓。取而誦之。稱許再四。曰。兄詞真如醉臥丁香花下。酒醒月上。香屑沾衣。疑是仙人修月。墮下瑤霜一片也。生笑曰。兄謬賞矣。遂

相與縱談。聲震屋瓦。言次生詢以鳳明府。溫答曰。父執也。與吾父相友善。有所云。無不諧。生告以故。卽挽之作冰。溫笑曰。吾兄眼識佳哉。此女倜儻不羈。毫無脂粉態。戚串中之拘謹者。多不直之。以吾儕觀。自是大好女兒。得君作匹。可謂美滿良緣矣。會當商之吾父。爲兄詠執柯耳。生大悅作謝。歛洽良久。溫始辭去。

越翼日。溫至。賀曰。諧矣。生喜曰。請言其詳。溫曰。余歸卽言之。吾父。吾父嘉兄之清族美才。且稔知蓮儂之韶艷。深願爲此一雙璧人。作撮合山。亟詣鳳明府而言之。明府耳兄名久。亦頗欽佩。願欲驗兄才。將招兄往讀於其家。高明如此。又何患耶。吾是以云其諧也。生亦私心獨喜。

數日後。明府果折簡招生。生負笈往。明府降階迎入。審諦之。皎如玉樹臨風。瀟灑美少年也。明府爲服政之年。葛巾淡服。神氣蕭爽。亦老名士也。傾談移晷。明府益心折。拈髯笑曰。若真翩翩濁世之佳公子也。溫公不余欺哉。遂館諸其家焉。明府家園林頗盛。時值首夏。楊枝滴翠。苔徑紆青。池水漣漪。每動搖於薰風。曲折

而生微波。日光斜射。炫耀如白銀色。一寸二寸之魚。時時潑刺於水面。加以綠陰幽草。燕語鶯歌。淑景鮮妍。如入山陰道上。生之讀書處。爲園內之一精舍。湘簾棊几。淨潔無纖塵。棟風乍拂。清光猶浸於樞間。明府時就生。與之評駁古今。研精典籍。生殊博洽。雕繢粲花。香溢齒頰。每及哲理。思想湛深。尤覺非意所及。明府大服。至是而益心屬。

生館明府家既久。風亭水榭。頗資游賞。時火雲匝地。綠樹陰濃。日長如小年。每趁晚涼之餘。躑躅於青草池頭。徘徊於薔薇架下。以消終朝之埃鬱。茉莉新開。芙蕖蕩漾。亦饒清韻。

一日日落滄江。薰風徐至。蹀躞樹陰。流連不忍去。少選。冰輪湧出。心神頓覺一清。忽有笑聲自疏林遠度。曰。今夕大好清輝。不啻作廣寒游也。生亟凝視。則蓮儂攜一垂髻小鬟。珊珊而來。宛如臨風楊柳。初日芙蓉。較初遇時。尤艷絕也。乃趨而揖之。蓮儂故瀟灑。不之避。且微窺父意之有所屬也。欲覘其才。於是叩以詩詞等項。

生一一答之。繭絲繩跡。游刃有餘。最後復以近作無題二絕示之。詩云。

曾築蘭橈渡愛河。天花亂着病維摩。仙風吹墮瑤池月。一樹紅薔映碧波。冷

落蓉城二十秋。不堪重上綠瑤輈。峯青江上聞靈瑟。憶向天階詠玉鉤。

蓮儂閱畢。曰。郎君清才。直當盥薇誦而買絲繡。特未免綺情過重耳。俄而小鬟入。言明府至。始各散去。

自是以後。箋札倡酬無虛日。蓮儂心中目中。固以爲微斯人吾誰與歸。生亦落拓風塵。蕭條琴劍。舉世皆濁。誰是真知音者。韓非孤憤。長吉心肝。欲付之於名節事功。而無所用。欲寓之於知交師友而不可得。故不得已而鍾情於巾幗。以寄其牢騷憤懣之懷。至是得蓮儂。可人如玉。宛然解語之花。而婚姻之成也。又無罣礙。無恐怖。如風行水上。自然成文。樂事賞心。至此已極。於是翻爲古今來才子佳人。惜其飄零。惜其淪落。惜其緣慳。嗚呼。情人之情。固不當如是哉。

蓮儂與生之箋札往來也。明府微聞之。明府性曠達。不拘繩尺。聞茲言。不惟不怒。

且笑謂其夫人曰。豈知秦樓客。竟偷看苑內花矣。然婚姻之道苦。多由於素不相識之人。強爲作合。是以化離啜泣。反目興嗟。而紅顏之怨。白頭之吟。所由來也。蓮儂若是。他日當不歎天壤王郎矣。吾豈若彼愚夫婦之於小兒女。一舉動輒爲嫌者。夫人亦笑頷之。

西風刻骨。落木蕭蕭下。一年容易。又是深秋。雁語啾啞。梧桐葉落。白雲紅葉。點綴秋光。有滿城風雨。近重陽之概。

一日。生起方盥沐。家僮以一紙衍波箋上。云自蘇台來者。接而視之。則母病而促之歸也。於是亟入謁明府。且告以故。明府餞之於浣花堂畔。且語之曰。余此次之招足下。本欲養高才。并以弱息奉箕帚。今既太夫人病亟。勢不能久留。惟望將此事稟明。如不見却。卽以足下來時。爲團圓佳期可也。生唯唯敬諾。遂珍以數語。悵然作南浦別。

一肩行李。倉皇就道。金風瑟縮。侵肌既傷。長別又痛。親痾綺恨。重重攙入風雨聲。

裏泠泠融於耳膜。加以居蜀數載。直有第二故鄉之觀念。嵐光波色。在在愁人。半响達江濱。攜裝登艇。激浪飛花。若冰山之峭立。愁雲蒼鬱。天色迷離。憑欄以觀。怒濤之搏擊。俄而汽笛一聲。一刹那頃。已閃入煙波深處。

生既去。明府入告夫人。蓮儂聞之。雖未免兒女情長。無可奈何。長嘆而已。

天寒歲暮。冷氣森森逼人。一片號泣聲。從幽咽之北風中透出。白打錢與雪花相掩映。素車白馬。黯然羅列。噫。此非鳳明府之珂里乎。則此慘悼之景况。胡爲乎來。蓋雲生去既數月。夫人以中寒故。藥石無靈。纏綿兼旬。竟向西方極樂國去。煙鎖北邙。與青山而終古。

明府以痛夫人故亦病。久而大漸。乃謂蓮儂曰。我風中殘燭。夫復何言。惟汝伶仃孤苦。無枝可棲。實余生平第一憾事。今幸許匹雲郎。伊來時。可從速結褵。以慰泉下。現擬往喚汝族叔裕後。彼雖不仁。暫以相託。當無妨也。蓮儂聞之。涕不能仰。俄而裕後至。明府語之曰。余荏苒一生。惟茲弱息。今以託弟。幸好護持。裕後亦敬諾。

語畢遂逝。蓮儂悲哀欲絕。裕後則爲之摒擋家事。經理喪政。自殯歛以至葬祭。靡弗盡力。似頗篤於兄弟之誼者。實則旬月之間。於其財產。已糟食實者過半矣。裕後既葬明府。遂挈眷居於其家。鵲巢鳩占。而蓮儂反似附食者。稍不如意。訶譴輒至。蓮儂亦聽之。惟日盼雲生之至。

裕後固奔走於侯門者也。嘗爲郭師長門下食客。食客既衆。裕後又無長技。足以博師長歡。以故常人遇之。至是乃繩蓮儂之美於師長之公子。公子性佻脫。嘗以風流自命。聞其言。稍親近之。裕後乃招公子宴於其家。而使之窺蓮儂焉。

公子既見之。心凝形釋。骨肉都融。祇恨不能魂消真箇。商之裕後。裕後曰。是何難。惟恐公子得魚遂忘筌耳。公子笑曰。好爲之。半生富貴。我任之可也。裕後諾而退。公子去後。裕後乃與其妻設計賺蓮儂。而通之公子。策既定。裕後云往探戚。挈蓮儂往。蓮儂雅不欲。然不敢過違其意。乃隨之去。俄而車聲鱗鱗。至一處。戛然而止。蓮儂自車內視之。金漚浮釘。壯麗無比。門軍以十數。默思裕後乃有如此之貴戚。

殊出意外。既入，閱庭院數重。一女僕俟焉。曰：來乎？曰：來矣。乃挈之至一室。珠簾畫壁，優美絕倫。青玉之案，沈香之榻，金銀氣，脂粉香，氤氳一片。

少選，時有小鬟露半面來窺，隱隱聞私語聲。蓮儂之疑竇漸啟，而亦末如之何。俄頃，公子至，蓮儂反身欲遁，公子笑曰：勿爾，若叔賣爾矣。蓮儂驚問之，公子以情告。蓮儂曰：蒙公子錯愛，然羅敷自有夫，不願偶使君也。公子曰：卿天人，何必下嫁彼乞士，苟能從我，鳳冠霞帔，不難致也。且食前方丈，婢僕成羣，紅羅颯纒，綺組繽紛，較之彼繩樞甕牖，荆釵布裙，爲如何？蓮儂不答。公子出，命婢媼往勸，溫言以動之，不聽。威嚇以恐之，不聽。強聒之，則向隅而涕。黔驢計窮，乃反命公子。公子怒，命鎖置一室，食以脫粟，臥以布被，以俟其意轉。

蓮儂自是終日以淚洗面，眉峯雨疊，蹙作愁山。秋水雙泓，縐成恨海。一枝穠艷，竟化作斷腸之花矣。

月餘後，督軍勅師長往河內平賊，而公子對於蓮儂之一問題，頗難解決，留之無

益棄之可惜。某參謀恐其有礙於師長之聲名，以速官謗，請舍之。曰：天下多美婦人，何必是公子？亦覺進退之維谷。遂命裕後挈蓮儂去。裕後之獻蓮儂也，本欲獻媚於公子，至是反見疏焉。深恨之，鬻之勾欄中。

蓮儂既墮風塵，心傷彌已。彼鴛母龜奴，狼子野心，惟利是視，不若彼紈袴公子，猶有憐香惜玉之心。聲色稍違，夏楚立至。蓮儂柔情弱質，其何以堪。不得已，乃許爲之侑觴。至薦枕席，作夜度娘，則誓死不從焉。假母恐迫之急，反生意外變，而失去一顆錢樹子也。乃聽之，而蓮儂遂爲倚雲紅杏矣。閨苑天葩，飄茵墮溷，藐姑仙子，帶水拖泥，天公亦太不仁哉。

彼雲生果何如乎？石沈大海，煞費猜疑。抑已有新人笑，不記舊人哭歟。抑姑蘇台畔，芳草離離，竟忘却白帝城邊，一聲聲不如歸去歟。烏知其非是。

蓋彼方歸，母已殂謝，哀毀逾恒。遂支離如鶴立，既寡親支，又鮮兄弟。既葬之後，宗族涎其產，瞰其弱，羣思攫得一瓣以爲快。書生無力，任其播弄，惟幸雞肋之不飽。

老拳而已。加以烽煙匝地，音問不通，故無一紙書以報好消息。至是乃束裝就道，又已碧雲天黃花地矣。電掣星馳，滿意與其意中人結美滿良緣，以償別後之相思債。孰知蓮儂歷重重之苦惱，受無量之委屈，而當其起行日，正彼墮落第二重魔劫之時乎。

生既至蜀，以前度之劉郎，訪舊時之王謝，則燕子紛飛，桃花依舊，人面已不知何處去。直如丁令威化鶴歸來，風景不殊，舉目有河山之異。大驚問之居鄰，盡得其實，心爲之死，血爲之冰，離恨千重，閒愁萬種，都向一點靈犀中作輾轉，頓覺天荒地老，無一線之光明。海恨山愁，紛百感之交集，腰肢柔軟，如絮沾泥，可吹而散也。

已歸沙吒利，何處覓無雙，人生恨事，孰過於此。始信冰輪易缺，好事多磨，之非虛語。人海姻緣，除非窮秀才與黃臉婆兒，或不致有意外風浪，以雲生之才華，匹蓮儂之韶秀，重之以父母之命，媒妁之言，遇合圓滿，並世無二，直欲於愛河情海之

中。闢一新天地。固不料其破壞決裂之至於斯也。

生至既數日。百思不得其策。欲以騙賣聘妻。控之於官。則雖約紅絲。終虛玉鏡。溫公父子。又皆遠征。事無佐證。恐難得直。進退維艱。跋前疐後。嘗終日不食。終夜不寢。以思無益。

墨雲四布。風啾啾若鬼哭。電燈明滅。慘淡作青燐色。生于暗中。冀有所得。悲憤填膺。轉不覺天地之寂寥。臨風玉樹。已不知消瘦幾許。肅肅宵征。可憐亦復可慘。豈知天公最慣弄人。當雲生躑躅咨嗟時。適蓮儂侑觴歸。經此瞥見雲生。萬感塞喉。嗚咽不能成聲。半响始出言曰。郎君救我。而龜奴已促之去。

生此時覺人間世疾痛慘怛之境。至此已臻其極。時雲益蹙。風益急。木葉飛滿空際。流水澌澌。與耳鼓相接。觸似故弄其淒厲。以助愁人之愁者。無何。天之雨。河之水。與生之淚。上下而同流。淒涼幽咽。若錢塘八月之濤。以工愁善病之雲生。奚能堪此。不覺拊膺自言曰。大丈夫不能庇一女子。任其零淪擊海。非夫也。夫如是不

如死。遂趨至河濱。拔足欲投。忽有自後牽其衣者。柔聲曰。癡男子。豈碧波天中有極樂世界乎。側視之。美麗姚冶。服飾淡素。亦好女子也。乃曰。姑娘勿爾。人樂生。我自樂死。女詰其故。生此時如鯁在喉。盡吐以告。女聞之。太息曰。如是。苦郎君矣。然皇天不負多情人。郎君靜俟之。其或有好消息也。於是舉古今悲歡離合之情史。以相勸慰。生意少解。女問其居址。分道而去。

蓮儂自見生後。望君如歲。益形傷悼。芳心與銀燭同煎。血淚共紅綃一色。瘦損容光。爲郎憔悴。已非復當年之瓊蕤玉蕊矣。

一夕。假母方教之度曲。忽有皂衣數人。排闥直入。呼曰。速起迎。督轅石公至。衆呆如木雞。矗立不知所爲。蓋新任督軍。頗盡心庶政。嘗微行民間。察其疾苦。遇不平事。立時判決。其公務旁午時。則命心復幕員石蘊琪代之。亦能稱職。是以衆聞聲而先懾也。

石旣入。呼搗母前。扑之數十。喝之曰。爾何人。敢買明府女爲倡。其將身價券與余。

敢有違者。立決爾首。搗母戰慄不敢言。石遂索其券而挈蓮儂去。

更深夜靜。寒月歛光。四壁蟲聲唧唧。如助勞人之歎息。生蟄伏斗室。青燈照壁。無限淒涼。鐵馬丁東。若斷若續。正是傷心時候。忽有聲自西南來。曰。陶朱公載得西子來矣。俄一偉丈夫推一女子入。生視之。蓮儂也。驚喜交集。不知語之何從。少頃。蓮儂以實告。生將拜謝之。石笑曰。勿爾。余已爲汝僱舟。宜速行。遲則敗矣。遂趨至江濱。舟子解纜竟渡。石則反身去。風激浪飛。遲明已行數十里。終不知石之何故。若是之相助也。日既升。舟子繫纜江渚作朝食。生攜蓮儂散步岸上。則石先在焉。手提革囊。據石危坐。趨前羅拜。若崩厥角。石指其革囊曰。此若叔頭也。檢而窺之。鬚髮交而血淋漓。大駭。復致研詰。石曰。向不言者。以事機不密。懼有宣洩。今已告成。不妨相告。君等知余果何如人乎。乃以手爪其面色。泥簌簌下。如泥壁之丹堊。爲風雨所剝蝕者。既而真面目現。則前次河濱之女子也。女宣言曰。儂深於情者也。情深不已。欲以己之情。情人之情。使有情人。都成眷屬。而後儂願始償。曩見君

懊懣之狀。遂日夜揣摩石墓員形狀。三日而神似。五日而畢肖。故弄此狡獪伎倆。爲君作合。至情魔如郭公子鳳裕後者。儂終不欲其生存於情世界。河內一役。全軍盡沒。公子已伏其辜。所以不卽行者。爲若叔一顆頭耳。今事畢矣。儂心遂矣。子其勉之。遂翩然而逝。儻忽間已失所在。生與蓮儂驚異者久之。乃星夜奔還鄉焉。

少年客

昔有紀人龍者。善技擊。慷慨任俠。常客游湖襄間。有潘姓者。家饒於財。亦以俠聞四方。技勇之士。多游其門。紀往訪之。皆喜。欵接甚至。宴會間。座客幾二十人。潘錚錚士。酒三巡。各述技擊師承。談論鋒起。末座一少年。敝衣露肘。短髮突鬢。默不一語。紀問主人。此客來幾時矣。潘曰。將及半年。問何能。曰。不聞所能。但隨堂粥飯已耳。衆大笑。少年亦不語。後數日。復讌集。忽有欵門通謁者。鐵面短髮。裝束甚武。拱手向主人曰。聞今日羣英雅集。敬來觀光。乃遍睨座中人。至少年曰。汝亦在是乎。少年但俯首不語。潘乃延客上座。飲啖兼人。旣而曰。今日之會。良非偶然。諸君曷

各奏爾能。余亦有薄技。當呈教也。潘大喜。移席射圃中。盡出其所用器械。諸人臂弓腰劍。無不詡詡自得。其人笑曰。諸君可云技矣。而未神也。乃於衣底出劍二口。盤旋騰躍。初如雪滾花翻。閃爍不定。以後但覺白光周身。旋轉如月。衆觀時。少年立最遠。既而衆亦漸漸遠避。方愕眙間。其人忽舉劍直擊少年。少年急走避。袖中砉然有聲。亦出劍二口。疾如金蛇。左右騰擊。與白光相激觸。寒氣森森。衆皆卻立十餘步。良久。白光漸縮漸斂。至土牆邊。戛然長嘯一聲。向東南而逝。衆驚就視。惟見少年背手立牆陰而已。急羅拜問故。少年曰。吾輩皆習劍術者。彼實與我同師。以我技出彼上。不相能。狹路較擊者七次矣。始我聞主人名。意門下必多奇能之士。倘彼來時。可以相助。豈謂皆碌碌不足數。子固皮相者。不足與言。吾亦從此逝矣。一躍登屋。再躍不見。自是潘任俠之心頓滅。而諸人言技擊者。亦各星散云。

鉢兒

鉢兒。隴右大俠也。家世商賈。其生時。父夢一老僧捧鉢入。委於堂而去。故名曰鉢

兒鉢兒生而面目黧黑，體肥壯異常兒。父母以夢故，頗珍之。六歲卽爲之延師讀書。顧性奇魯，年十三，識字不盈百。時當共和告成，土匪徧地。一日忽傳匪至涇州，地當兵衝，鉢兒一家欲遷徙，已不及。爲匪聚而殲之。土匪以鉢兒年幼，未遽殺，縛之林中，手足繫巨繩懸樹枝。明日過之，繩斷人不見。空山荒莽，皆謂禽獸魅魍啖之矣。屠鉢兒一家者，匪首某所爲，而僞參謀某贊成者也。匪亂越二年，官軍不能剿，河隴糜爛，顧終不能東向。規尺寸，會袁項城命軍來討，土匪內懾，其魁某一夕方會議進止，忽電光穿窗櫺入，魁已仆地。參謀驚呼，衆視之，眸子抉矣。一座駭然。鉢兒族人，有被脅爲火夫者，是夕方眠，有撫其肩者，驚起視之，鉢兒也。方駭愕，鉢兒牽其手，超而升屋，不覺身輕於燕，飄從之。越垣十重，安然抵城外，復趨行數十里，聞鷄啼，鉢兒指道旁一舍，令入之。舍中積糧食，芻薪甚富，還顧鉢兒，已不知所之矣。問耕者，則邠州長武縣也。自是鉢兒之名，著於秦隴間。土匪首領酣寢，無故自驚曰：鉢兒來矣。秘密軍事，時時喧傳於外，則云鉢兒所言也。由是軍心益亂，不

能支官軍得乘之。悉定關內。長驅而西。團長某。湘人也。在軍中頗以材武著稱。而淫掠特甚。某帥知之。惜其勇。不忍繩以法。大軍已出。團長在後隊。猶駐甘州。夜臥。得鉢兒書於枕畔。痛數其罪。勗以改悔。團長得書大怒。以爲同儕侮之也。衆爲力言皆不信。且曰。吾之作爲。將有甚於今日者。看彼如何。日夕。遽失其首。於是甘省大吏。乃名捕鉢兒。然終不能得。而鉢兒之掉臂遊行自若。一月得尸於衢者數次。皆朱書其罪於背。簽名卽鉢兒也。其踪跡飄忽。往往晨有事於彼。未午已復見於此。相去或至六七百里。柴得標者。隸督署爲排長。其先一劇盜也。能上下高城。其妻貌絕美。勇且過之。夫婦旣投誠。數清伏莽。立奇功。乃委柴捕之。柴力辭不獲已。歸商於妻。其妻請自任之。惟須聽所爲。夫不得問。柴許之。於是其妻結束爲江湖賣解者。四出伺之。秦知事者。銓次隴右。因在某帥幕中爲文案。土匪事定。始東入關。行橐中。攜書數百卷。盜矚之以爲金也。行距蘭州數十里。槍聲起草中。秦欲策馬奔。而丸貫其脅。遂昏絕。俄而醒。則身臥道旁。少年立於側。資裝故未失也。惟創

覺痛。少年出朱丸，授令服之，病稍止。問少年姓名，不應。指十步外，赫然者，伏屍二具也。少年遂護秦至逆旅，命酒對酌。酒酣，謂秦曰：東廂有武伎，方日我，速往召以來。曰：鉢兒呼汝。秦如言，武伎驚，卽從至堂上，俯首不敢仰視。少年笑曰：爾輩計誠拙，尾我胡爲使爾來，將用美人計耶？伎不敢應。少年斟酒曰：盡此，吾與汝功。伎盡之。少年曰：我堂堂一男子，乃授首汝輩，不令天下豪傑笑人乎？汝今夕急馳報督署，云人頭已得，無他言。伎乃躊躇。少年叱曰：不速行，而翁豈誑汝耶？更探懷出白金兩錠，授秦曰：吾今當兵解，以後事累君，煩以此辦之。秦欲有言，少年已不見。柴妻馳而返，夫婦夜叩督署稟白，督軍方眠，驚而起，則人頭在案上，屍則橫階下矣。柴語所由，畏其神，不敢懸示。秦乃以贈金購棺木葬之。

一耳僧

民國二年，余友章生，泛舟巢湖，中途有一僧來求附載，意以獨行苦寂，慨然允之。僧皤然老矣，龍鍾傴僂，登舟後，向章一合掌，卽倚舷默坐，狀若甚憊。章顧僧獨有

左耳大異之。欲問而僧方閉目靜攝。章亦不欲擾之。無何天已曠黑。舟子停舟葦灘畔。晚餐餐未竟。蘆葦中突出盜十餘人。僧歛起立。面盜曰。壯士勿凌孤寒。老衲身外無他物。此弱書生。布衾一襲。破書數卷而已。盜前行者笑曰。和尚勿預人家事。吾知舟中人資斧固未罄也。言時一躍而登。僧以手格之。墮水。餘盜大譁。紛然競上。僧舉篙一揮。踏者六七人。餘乃辟易不敢前。僧倚篙叱曰。老衲五十年前。殺人不眨眼。今持戒已久。姑宥汝輩去。再怙惡劫孤客。老衲若知。必不汝宥也。盜衆相顧悚息。作鳥獸散。章頓首謝僧。僧笑曰。鼠輩乃於班門弄大斧。居士亦知老衲五十年前。爲何如人乎。穎川道上。有所謂飛黑張者。卽老衲是也。章聞言且駭。且注視其耳。僧自指其缺耳。歎曰。老衲非經此懲創。安肯放下屠刀。居士知吾削髮故乎。吾穎固多盜。然盜亦有道。不劫孤客。不犯淫戒。非萬不得已。不殺傷人者。爲盜中正宗。老衲甫冠。已爲此輩之魁。行道幾十年。恪守宗風。所獲亦無算。一日方午。於臨淮道中。遇一乘車少婦。容光豔絕。一見卽不自持。策騎尾之。殘陽入崦。始

抵一村落。礪樓矗立。巍然一巨堡也。余自恃技精。越高牆如履平地。是夕爲上弦。新月銜山時。翩然竟入堡內。偵知少婦所居爲小樓三楹。余攀簷俯窺。見樓中燈火通明。紅窗四扇。尙啟其一。少婦已卸粧。而宅中僕婢。尙憧憧往來。余伏瓦上良久。衆聲漸寂。少婦亦入幃。鼾聲作矣。余乃推窗入室。中芳氣襲人。余此時如入醉鄉。逕前牽其幃。而婦已覺。叱余曰。若欲假資耶。櫝中多阿堵。可持去。余笑曰。乃公非利汝資。欲親汝薌澤耳。語未畢。余之右耳。已脫然入其纖掌。余不禁長跪乞哀。婦曰。若亦好身手。趣去無多言。余出堡後。見余騎齧草路旁。余掉臂竟去。且行且思。恍然悔悟。念少婦殆菩薩化身。導余改行爲善者。乃向堡再拜。誓入空門以贖前愆。由是苦行數十年。回首前塵。已如隔世。今日見鼠輩無狀。又動嗔念。幾犯殺戒。然與居士相遇。亦是宿緣。世路多荆棘。出而求名。固不若隱居以求志。居士慧心人。當不以老衲之曉舌爲忤也。章再拜受教。以金爲贄。不受。強之。則跌坐瞑目。寂然不應。及旦章睡起。覓僧不見。問舟人。則天明時僧忽登岸去。衆追留之。僧健

步如飛。轉瞬間，已入蒼茫曉霧中逝矣。

爨下老媪

紅蘭，吳門女子也。以家貧，淪樂籍，非所志也。媚而不洩，嬌而不蕩。既入勾欄，視如藩溷。然而麗質天生，月魄難掩。以故芳名大噪，知名士無不交口譽之。顧姬於富家子視之漠然。每遇潦倒窮漢子，必曲致殷勤。或詰之故，曰：彼方侘傺，此時若再加以炎涼世態，不幾令其無生趣，豈有心人所當爲者。獨與某生稱莫逆，嚙臂爲盟，訂以婚嫁。生雖舊家子，而青春白袷，寥落多違。又安有纏頭餘錦，爲姬脫籍者哉。姬亦知之，遂不以無望者爲請，恐令生之鬱伊寡歡也。然終不能釋然。長嘆而已。積久成疾。時姬家有八十老媪居爨下者，爲姬所夙憐。而時加慰恤者也。媪雖龍鍾，頗知感激。微察姬意，因相謂曰：以娘子此日名，何患無華貴之選。以金屋爲藏嬌地耶。姬曰：始以媪爲解事人，何竟未知我心。夫走馬章台，率皆紈袴兒與膏粱子。徒以葑菲是好，又安知蓮芍之甘苦如某生者哉。彼也力綿，我也命薄。萍水

相逢。又焉知他日者不終爲勞燕耶。言之黯然。媪曰。果爾。我當爲娘子玉成之。非難事也。姬以他語亂之。恐爲搗聞。而重感其意。一夕乘搗他出。媪將負姬逃。姬曰。奶奶老矣。安能爲此。與其中道而不致。何如其已也。媪曰。我本太湖暴客妻。今雖老。猶視三百斤物。如執箕帚若爾。亦當以老腕揮運之。況纖秀如娘子者。正當舞余掌上也。既至生所。生懼訟累。不敢遽受。媪探懷出姬鬻身券契。固七年前搗所失者。曾不知爲媪所匿。至此姬偕生倒地拜謝。媪曰。予盜此久矣。知娘子非久墜風塵者。故早爲今日地。然而此間不可久留。願得娘子釵兩股。一以爲紀念。一以售爲養老用也。言已。得釵去。若風吹電過。頃刻渺矣。未移時而搗至。蓋媪已訴姬去矣。而搗不知卽媪所爲。以其老也。搗至。生出券契。搗瞠目無所答。旋欲以拐騙控於官。觀者不爲之直。或勸生給搗銀百金。事遂罷。搗歸。媪亦不知所往矣。後生宦遊於蜀。姬已正內閫。隨之赴任。遇媪於峨眉之麓。髮盡黑。坐道旁摘野卉。姬下肩輿欲與通款曲。媪佯爲避勢。訇然一聲。墜澗下矣。生與姬再拜而去。

旅舍俠客

高端臨赴濟南公幹。寓於旅舍。間壁一客。彬彬儒雅。高旅中寂寞。與之晤談。頗爲契合。城外黃家莊。巨鎮也。酬神演劇。高於黃昏時。約客赴該鎮觀劇。客欣然從之。至則燈火輝煌。見神廟崇宏。遊人如鱗。竚立以待。久而久之。未見開場。暗詢土人。乃言該鎮有富豪黃某。聲勢煊赫。人畏之如虎。綽號黃老虎。彼未到場。不敢開演。所以遲遲。候至亥刻。忽人聲喧囂。衆言黃大人至矣。從者喝道。乘輿而來。至廟坐於看臺上。妖姬四人。侍於其側。班主乃命唱旦角者。敷粉塗朱。持單往請點戲。黃掀髯顧盼。欣欣自得。開演未幾。忽然一陣狂風。如練布一疋飛來。頓時燈火盡滅。迨燃着後。黃老虎之頭。已經不見。尸倒臺上。衆皆驚駭。竊議黃惡貫滿盈。天來報應。戲遂停演。觀者如鳥獸散。高亦偕客返寓。與之茗飲閒敘。高又談及黃老虎事。以爲作惡降殃。天網恢恢。疏而不漏。報施固不爽耶。客莞爾而笑曰。有是哉。袖出人頭一具。儼然黃老虎頭也。高戰慄愕。眙失色曰。此禍事也。君將何以弭之。客

曰毋懼。遂袖出藥粉一小包。用指甲略彈些須。立化爲鮮血一點。高叩客之姓名。堅不肯言。次日乃行。其殆劍俠歟。

丐報恩義

丐不知其何許人。幼習擊技。性好游俠。中年落魄。流蕩江湖。常往來於六橋三竺間。手執一杖。油然生光。日不離手。夜倚作枕。乞有餘。輒施同輩。勿少留遺。見年富力壯者。並力勸之改業。無使溷入卑田院間。或賣藝求貲。以助小本經紀。人得其超拔者。實繁有徒。杭人邵芝洲。落拓不羈。好交遊。偶遇丐賣藝。觀其所使刀劍棍棒。五花八門。俱增妙境。具真本領。洵非池中之物。慨施錢物。以成其志。丐深德之。詢其住址。登門求見。邵延入。優加待遇。與之談古今豪俠之事。手舞足蹈。旁若無人。自此往來過從。竟無虛日。一日。丐往見。拒而不納。問之。僕曰。已於昨晚隻身北上矣。丐大驚。亟返身而奔。其疾如飛。蓋丐知邵赴京。必經山東。彼處多盜。恐遭不測。馳往護之。以備不虞。既而邵至登州界。荒煙蔓草。夕陽在望。鳥倦歸林。暮景堪

娛方詢御夫風土勝境言獨未已忽一鏢迎面飛來邵大驚失色旋見白光一閃將鏢打落而第二鏢又至打落如前一大盜由林中躍出怒目圓睜厲聲喝曰狗奴膽敢落予鏢誓不與爾甘休邵手顫心悸噤不能言突有一人挺身出曰君弗懼有我在此視之卽丐手執利劍與盜很鬪雙劍飛舞如銀濤雪浪目不能辨相持未幾盜斃劍下時邵伏伺樹間急起謝曰非君至我命休矣再生之德何以圖報丐曰感君恩義不辭微賤青眼相待故隨後暗護俾長途得以無恙也邵見其仍持一杖問曰君之利劍何往乎丐將杖一拔乃一利劍光鋌閃爍寒氣逼人曰此我護身符也邵曰此真干將莫邪非君莫屬然以君之英雄曷不銳自建白立功宇宙而乃泯泯焉隱於丐乎丐曰當今之世植黨營私爭權奪利廉恥道喪禮義無存舉國風靡淪亡無日孰若丐之遨遊天下逍遙自在理亂不知曲直不聞旣免許多煩惱而享真正自由之爲得耶邵聞之深爲嘆服迨送出魯省丐曰此去坦平大道可無他虞請從此別邵問其所往曰朝山訪道行踪無定昂然而去

後邵探訪終不得其人。

張明德

吳興張明德賦性勤慎。慷慨任俠。絕無驕矜氣。幼精技擊。百步外取人首級。如探囊中物。毫不費力。平居恂恂如儒者。無人識其能。嘗至禾郡。就米肆司事。地方惡棍。見其狀貌誠樸。故擲揄之。甚或圍而擊之。以爲笑樂。張不少愠。亦不還擊。或問之。曰。設有二虎相鬥。大者傷。小者死。今彼雖擊余。余實無傷。若或還擊。彼之生死。悉懸予手。重則死。輕則傷。毋甯忍耐一時。弗擊爲妙。一日。陽烏西墜。暮色蒼然。忽盜一羣。明火執仗。蜂擁而來。破扉直入肆中。夥友莫不駭然驚避。奔走一空。獨張挺身出。大聲喝曰。何物強徒。敢入吾肆。豈不聞吳興張某在是耶。言次。突出雙劍。鋒銳無比。舞劍猛擊。盜亦揮刃還擊。鬥未數時。盜作劍下鬼者。已十餘人矣。始大驚懼。呼哨奪門而遁。不敢回視。米肆賴以保全。衆方知其非池中物。不欲以藝示人。故甘俯首胯下也。張恐盜報復。貽累肆中。不便久住。翌日遂辭去。後不知其所。

終。

雙鐵椎

李某江陰人。素好交友。距城十餘里。有古刹。一老僧卓錫焉。風晨月夕。與之往還。甚相善也。一日忽見老僧榻下埋大鐵椎一。重約百斤。半陷於地中。異之。叩以故。僧狀忸怩。置之不答。固詰之。乃曰。予與子交稱莫逆。不妨明告。子知之乎。數年前。江湖上號稱雙鐵椎者。卽予是也。居常以力雄人。尤喜舞雙鐵椎。出入必與俱。不稍釋手。當年綠林豪客中。首屈一指。先是有富家子迎娶。奩資巨萬。心羨慕之。因乘夜挾雙椎破扉入。甫入關。忽聞新人自床中躍起。大聲叱曰。庸奴。誰敢妄入吾闈者。予見其聲色俱厲。不敢輕與爭鋒。急遁走。詎女自後逐予。突爲所迫。急舞雙椎以禦之。則見女手執巨巾一方。飛舞左右。奔騰上下。沙石俱揚。久之。予一椎適爲巾所纏。遂爲所奪。疾馳而歸。僅以身免。竊自嘆曰。曩以技睥睨一世者。今乃困於弱女子之手。不亦大可羞乎。自是不敢復試吾技。斂跡藏踪。隱居於此。優遊歲

月以盡餘齒。今但留此一椎，聊作紀念耳。李聞之不覺起敬。夫老僧以一莽丈夫，徒以屈於弱女子，而能翻然改節，遜入空門，皈依佛法，其識已超人一等。語云放下屠刀，立地成佛，僧其有之。

黃景泰

保定黃景泰，俠客流亞也。貌寢不揚，膂力無窮。與江南督軍某有舊，一日邀宴於公署。席間談及武藝，黃興勃然，以兩指撮全桌，高與胸齊，緩緩放下，如舉槁木。杯盤盃碟，依然如此，神色不變。衆客異之。制軍請其試技，黃以空拳發五響聲，宛如雷鳴。制軍曰：此五雷術，未足奇也。黃曰：請諸君毋懼，再施一術可乎？衆皆曰諾。俄見白光兩道，盤旋飛舞，天地變色，房屋震動。客有顛仆於地者。督軍急搖手以止之。黃曰：不開戒，不能止。制軍曰：園中有桂樹，請戕之。言未畢，白光已收斂。天氣復清和，往視桂樹，枝枒滿地，僅剩半株矣。衆問所以，黃曰：俠客有三，上等刀由眼出，次由鼻出，又次由口出。今所見之兩道白光，由鼻中出也。惟不開戒，不能收回。故

不常試耳。又嘗與客奕，兩指夾棋子一擊，立與桌平。手力之巨，可見一斑。後不知其所終。

黑衣女

海虞陳國英，精技擊，數十偉丈夫，不能近其身。性慷慨好施與，里有不平事，恒拔刀相助。俠名播一鄉。嘗仰天嘆曰：男兒當爲萬人敵，立功異域，爲史冊光，豈卽草草以終邪？遂投身某將軍麾下，衝鋒陷陣，必首告奮勇，積功得少校位。既而廢然返，拊髀太息曰：天下事不可爲矣。彼干城之具者，盜匪之變相耳。生當濁世，豈英雄用武時。吾其從赤松子游乎？於是隻身走深山大澤間。冀有所遇。一日薄暮，控馬獨行萬山叢中。時方殘秋，草枯木脫，觸目荒涼。而夕陽將下，餘光猶在。慘紅乃如血染，俄而遠處忽起烟塵，呼嘯之聲隱隱可聞。知必有暴客至，循聲迹之。曲折行里許，果見二盜立馬上，持長鎗，合戰一執雙劍之黑衣女子。三騎往來旋轉，地上落葉爲之紛飛。少選，女子漸不支，勢且危。國英見事急，適未携兵器，乃拔道旁

棗樹直取二盜。咸披靡遁去。女子見敵人敗北。躍馬趨國英前。具道感謝意。斯時斜陽已匿。天際黑幕四垂。而遠山隙處。一鈎涼月。已漸漸上升。國英至月光下。微矚女殊秀麗。螓首蛾眉。美態天然。不類能武者。不覺神奪。女見國英英偉過人。亦赧然若不勝情。既而曰。寒舍去此不遠。幸屈顧。國英諾。二人遂並轡緩緩行。約程二里。卽見茅屋數椽。前臨曲水。後倚叢山。風景殊清絕。下馬後。女肅國英入。有邁媪臥室中。意其母耳。女乃陳遇盜事。且云。幸遇此壯士相拯。媪聆言。仰首視國英。頗致謝忱。須臾曰。兒且入。爲佳客具餐去。女旣入。媪謂國英曰。壯士容貌軒奕。決非尋常人。殘年得瞻丰采。幸矣。敢問何姓。已娶未。國英一一答之。媪曰。是最佳。老身年七十矣。膝下無兒。僅此弱息。雖山野陋質。尙不惡。茲擬以侍巾櫛。壯士以爲如何。國英曰。承媪不棄。固愜所懷。顧彩鳳隨鴉。僕殊慚也。媪曰。壯士何謙。旣蒙俯允。不勝欣幸。第窮荒野人。不識繁文縟節。卽以今日一杯濁酒。草草成禮可矣。是夕禮畢入洞房。國英自燭光下視女。覺其娟美尤勝月下。而所衣仍黑色。奇而詢

之。女不覺泫然泣下。自陳母早死。父本爲盜。不幸爲仇家所殺。一家流離失所。吾時僅九齡耳。幸賴此媪得不死。蓋媪非生身母。實乳母也。媪善武藝。盡以傳吾。撫養一如己出。黑布一匹。爲當日父賜媪者。因以畀吾。裁爲衣。終年不離身。所以誌不忘也。國英復詢仇家爲誰。女曰。亦姓陳。名則爲潛蛟。吾踏遍天涯。至今猶未得其蹤跡。國英聆畢。不期失色。恐而請曰。乞卿殺我。潛蛟蓋吾父也。今逝矣。卿爲父報仇。臥薪嘗膽。其孝可嘉。請卽殺吾。以全卿孝。國英語竟。女亦驚起曰。君卽潛蛟子耶。天平。然則吾於仇人婚矣。將何以對亡父於地下。言時。怒目切齒。錚錚有聲。有頃曰。在理吾當殺君。然君有恩於吾。殺君爲不義。不殺君則又爲不孝。不孝不義。何以齒於人類。已耳已耳。爾我姻緣。盡於此矣。行再相見。言畢。卽穿窗去。涼月猶在天半也。急出覓之。媪亦不見。惟四顧寂寂。一燈熒然。戶外風捲殘枝。猶撼撼作聲。國英痴立如在夢中。長嘆而已。

中華民國十三年二月付印
中華民國十三年三月發行

○...○
歷代劍俠全傳...○
○...○
全書六冊●定價一元八角...○



分發行所

廣東 北京 漢口
永漢北街 楊梅斜街 楊梅斜街
江西 長沙 開封
府學前街 萬福街 書店街

廣益書局

編輯者	瀨江許慕羲
校閱者	廣益書局
發行者	廣益書局
印刷者	廣益書局
總發行所	上海棋盤街廣益書局

●●●●●
■ 夜行飛俠 ●●●●●

●●●●●
■ 驚世駭俗 ●●●●●

●●●●●
■ 酒後茶餘 ●●●●●

●●●●●
■ 消遣妙品 ●●●●●

夜

行

飛

俠

傳

是書叙一貧士。欲進京赴試。苦無川資。忽天外飛來俠客。慨助贖儀。乃得成行。途中歷遇艱險。均賴俠客扶持。始免于厄。其設想新穎。情節變幻。固已驚心動目。而描寫俠客仗義。俠女多情。以及縣官顛預。師爺狡猾。盜賊橫暴。篋片尖利。尤能繪聲繪色。淋漓盡致。讀者欲得茶餘酒後之消遣品。盡興乎來。上集一冊。定價二角。外埠函購。另加郵費。

新的小說

請閱文字雅潔趣味深濃

- | | | | | | | | |
|--------------------------|--------------------------|--------------------------|--------------------------|--------------------------|--------------------------|--------------------------|--------------------------|
| 快直
活正 | 大笑
觀話 | 小言
說情 | 小言
說情 | 奇鑽
案石 | 機偵
關探 | 機偵
關探 | 小俠
說情 |
| 哈哈
笑 | 快活
林 | 青鳥
媒 | 守羅
村 | 三劍
客 | 粉蝶
兒 | 紅娘
子 | 雌雄
劍 |
| ……
(八冊)
……
一元六角 | ……
(一冊)
……
定價四角 | ……
(一冊)
……
定價三角 | ……
(一冊)
……
定價四角 | ……
(一冊)
……
定價三角 | ……
(一冊)
……
定價三角 | ……
(一冊)
……
定價三角 | ……
(一冊)
……
定價六角 |

